

■ COLUMNA

Dumondas senza fin

DA GIUSEP NAY, VALBELLA

Ins perdunia che jau
m'annunziel gia puspè.

La discussiun en connex
cun las expectoraziuns
e la tenuta dal president da
«Graubünden Ferien» – gia
ch'i na dat nagina expres-
siun uffiziala rumantscha
correspondenta è in scan-
dal – na po laschar quiet
nagin cun anc in zic
schientscha rumantscha u
taliana grischuna.

Quai che Andreas Wie-
land sa lubescha cun
pretender da chalar ad in-
struir rumantsch e talian
en nossas scolas n'è betg
mo fallà e betg perdert,
mabain simplamain intole-
rabel.

La lingua e cultura tu-
destga, franzosa, taliana
e rumantscha èn elements
constitutivs da la Svizra.
Quai di nossa Constitu-
ziun federala. Quella ren-
conuscha er il rumantsch
sco lingua uffiziala sin
plaun federal en il contact
cun Rumantschas e Ru-



mantschs. Tenor nossa
constituziun chantunala èn
il rumantsch ed il talian
linguas uffizialas dal Gri-
schun.

Co pon in represchen-
tant dad in'istituziun
semistatala e quella sezza
ignorar constantamain
quella veglia democratica
dal pievel svizzer e gri-
schun, senza ch'insatgi in-
tervegniss?

Nua èn ils represchen-
tants da la Ruman-
tschia e da las Vals talianas
en nossa regenza ed en il
cussegl grond, cura ch'i va
per far respectar nossas de-
cisiuns democraticas da la
Constituziun federala e
chantunala? E nua èn quels

da lieunga tudestga, sutta-
mess medemamain al dretg
vertent?

Pertge na pretendan la
Lia Rumantscha e la
Pro Grigioni Italiano betg
cun tutta detschertadad
ch'il pli aut represchentant
da nossa impurtanta insti-
tuziun per il turissem ve-
gnia, pervia da sia tenuta
anticonstituziunala en la
dumonda da lingua e cul-
tura, remplazzà senza tar-
glinar?

Co vul ins ch'il cor da
Turistas e turists battia
per il Grischun e cunzunt
per sia lingua e cultura ru-
mantscha e taliana, sche
quel batta strusch pli tar las
uniuns che las duain pro-
mover ed insumma betg pli
tar nossas autoritads stata-
les e semistatalas?

Quellas lingias èn scrit-
tas sapientivamain en
rumantsch, pertge che nus
Rumantschas e Ru-
mantschs avain il dretg da
vegnir tadlads era cura che
nus ans exprimim en nossa
lingua materna.